

Husein Muhamedagić



U Sarajevu je 19. novembra 1999. godine, u 92. godini života umro Husein Muhamedagić, poznati stručnjak iz oblasti geodezije, dugogodišnji prosvjetni radnik i direktor sarajevske Geodetske tehničke škole. Njegov dugogodišnji životni i radni vijek (u mirovinu je otišao nakon pune 42 godine staža) bio je ispunjen uspjehom.

Rođen je u selu Golubići, kod Bihaća. Još kao osnovac bio je zapažen kao bistar i nadaren dječak, a njegove nadprosječne sposobnosti dolaze još više do izražaja u klasičnoj gimnaziji u Bihaću, gdje inspektori zapažaju njegove sklonosti prema jezicima. Ali, zbog slabog materijalnog stanja, umjesto da studira jezike, poslije šest razreda gimnazije, dobivši stipendiju, odlazi u Beograd da uči za geometra. Završivši sa odličnim uspjehom Geodetsku školu zapošljava se u Direkciji katastra i državnih dobara u Beogradu. Vrativši se početkom rata, 1941. g., u Bihać, da radi u Katastarskom uredu, Husein postaje stalna meta okupatotskih vlasti. Zbog toga što je širio poznatu Rezoluciju Muslimana protiv progona Srba, bio je i u zatvoru, a zbog saradnje sa narodnooslobodilačkim pokretom, stalno mu je život bio u opasnosti. Poslije oslobođenja Bihaća vraća se na dužnost rukovodioca Katastarskog ureda, obavljajući i mnoge odgovorne dužnosti.

Nakon nepunu godinu dana, po zadatku, radi kao nastavnik u Geodetskoj tehničkoj školi u Sarajevu. Da bi mogao kvalitetno predavati (a dobio je odjednom tri predmeta) stalno je samostalno proširivao svoja znanja iz matematike, fizike, pedagogije i drugih oblasti.

Ispoljivši izuzetne nastavničke sposobnosti, Husein Muhamedagić ubrzo postaje direktor Geodetske tehničke škole u Sarajevu. Da bi olakšao i unaprijedio rad nastavnicima, sam je izradio katalog po generacijama i sastavio statističku tabelu. Zahvaljujući njegovim pedagoškim kvalitetama, sarajevska Geodetska škola je bila među najboljim stručnim školama ne samo u BiH, nego i u tadašnjoj Jugoslaviji. Generacije geometara koje su, tih godina, izlazile iz ove škole, u potpunosti su zadovoljavale sve zahtjeve društva, ne samo u stručnom nego i u opšt društvenom pogledu. Muhamedagić je obavljao i visoke dužnosti i funkcije u stručnim i društveno-političkim organizacijama.

Prešavši, opet po zadatku, u tadašnji Republički savjet za stručno školstvo, na dužnost savjetnika za stručne škole, ozbiljno prihvata novu dužnost, na kojoj postiže izuzetne rezultate. Radeći, zatim, i u Sekretarijatu za obrazovanje i u Republičkom zavodu za unapređenje školstva, daje značajan doprinos u izradi nastavnih programa stručnih škola i unapređivanju reforme stručne nastave. U svom bogatom, plodnom i pedagoškom radu, Husein Muhamedagić će još jednom postati direktor Geodetske tehničke škole u Sarajevu. I odmah će zavesti u školi red i disciplinu, ponovo oživjeti proizvodnu praksu. Čak će pridobiti učenike da produže školovanje poslije trećeg razreda za još jednu godinu, kako bi se što bolje osposobili za buduće zanimanje.

Bogato pedagoško iskustvo i znanje Huseina Muhamedagića dobija široku primjenu i značaj njegovim prelaskom u Skupštinu SRBiH gdje je obavljao dužnost savjetnika i sa tog radnog mjesta otišao u zasluženu mirovinu.

Dobitnik je više značajnih priznanja, a za zasluge u oblasti obrazovanja i vaspitanja dobitnik je nagrade "Hasan Kikić".

Mustafa Mehmedagić